



Inatsisartunut ilaasortat Finn Karlsen, Siverth K. Heilmann, Knud Kristiansen, Atassut  
MAANI

Inatsisartut suleriaasianni § 36, imm. 1 malillugu Halibut Greenland A/S-mit qinnuteqaatip itigartinneqarnera pillugu apeqquummik saqqummiussaqaqpusi. Apeqqutigineqartoq naalakkersuisoqarfinniit akineqartussanngorlugu ingerlateqqinneqarpoq.

22. april 2010  
J.nr.: 2010-78  
Postboks 269  
3900 Nuuk  
Tlf. (+299) 34 50 00  
Fax (+299) 32 47 04  
E-mail: apnn@nanoq.gl  
www.nanoq.gl

*1) Sooq Naalakkersuisut Halibut Greenland A/S qaleralinnut tunitsiviliinissamik itigartippaat?*

1-mut) Naalakkersuisut 2009-mi juulimi umiarsuarnik tunitsiviliinissamut akuersissutit pillugit qinnuteqaatit suliarinissaannut piumasaqaatinik nalinginnaasunik akuersissuteqarput. Piumasaqaatini nalinginnaasuni aalajangersarneqarpoq Naalakkersuisut suut tunngavigalugit umiarsuarnik tunitsiviliinissamik akuersissuteqartassanersut. Taakku <http://www.nanoq.gl/Emner/Erhverv/Erhvervsomraader/Fiskeri/Fiskeristyrelsen/~media/5A3175FDB2CC4F1DB8E4C020AE7F9622.ashx> aqqtigalugu aaneqarsinnaapput.

Ingerlatsivik Upernavimmi nunami 8-nik tunitsiveqarpoq ukiumut minnerpaamik 12.000 tonsinik qaleralinnik tigusaqarsinnaasunik. Ingerlatsivimmi Upernavimmi 2009-mut pisassiissutit 6.000 tonsiupput ukiullu naalernerani 6.500 tonsinut qaffanneqarlutik. Naalakkersuisut ingerlatsivimmut pineqartumut 2010-mi pisassiissutit 6.000 tonsiusut aalajangersarpaat. Tamatumani nunami tunitsiviit pisassiissutit tigunissaannut naammattumik tigooraasinnaanersut naliliiffigineqarpoq. Umiarsuarnik tunitsiviliinissamik qinnuteqaat aatsaat akuersissutigineqarsinnaavoq nunami tunitsivik tunisanut malinnaasinnaangippat.

Qulaani taaneqartut tunngavigalugit Naalakkersuisut umiarsuarnik tunitsiviliinissaq pillugu Halibut Greenland A/S-mit qinnuteqaat itigartinniarlugu toqqarsimavaat.

Apeqqummut matumunga atatillugu assit Innaarsunniillu Tasiusameersut qaleralinnik eqqaanernik takutitsisut ilanngullugit nassiuqqarput. Tamatumunnga atatillugu erseqqissaatigissavara Naalakkersuisut ataatsimut isigalugu aalisakkanik qaleralinnillu eqqaasarnit akuersinnaanngimmassuk. Eqqaasarneq pillugu malittarisassaqaqarpoq atuuttunik malinneqartussanik aamma malittariaqakkanik. Tamatumani Sinerissami qanittumi aalisarnermi pisanik tunisanillu nalunaaruteqartarneq pillugu Namminersornerullutik Oqartussat nalunaarutaat nr. 11, 5. juli 2006-imeersoq innersuussutigineqarpoq.

Aalisarnermut, Piniarnermut Nunalerinermullu Naalakkersuisoqarfiup suliffeqarfik pineqartoq qaleralinnik eqqaasarneq pillugu attaveqarfigisimavaa. Suliffeqarfimmit

nassuiarneqarpoq sapinngisamik qalerallip annersaa tunisassiariniarneqartartoq. Suliffeqarfiullu aamma eqqaanissamut akuersissut oqartussanit pigisartik ukiunik 15-nik pisoqaassusilik innersuussutigaa. Aalisarnermut, Piniarnermut Nunalerinermullu Naalackersuisoqarfik qinnuigisimavara akuersissut taaneqartoq misissoqqullugu, tassanilu pissusissamisoortoqanngippat suliap iluarsineqarnissaa isumagissavara.

Ataatsimut isigalugu Naalackersuisut isumaqarput peqataasut tamarmik, aalisartuugunik tunisassiortuugunillu, eqqaasarnerup minnerpaatinnissaanik suliniuteqartariaqartut pingaartumillu aalisakkat tulaanneqartut tamarmik annerpaamik pissarsiffigisarnissaat anguniarlugu, taamaalilluni annertunerusumik naleqalissammata.

NNPAN-imut tusarniaanermi akissuteqaat ilanngunneqarpoq.

Inussiarnersumik inuulluaqqusillunga

Ane Hansen  
Aalisarnermut, Piniarnermut Nunalerinermullu Naalackersuisoq